


গীতিনাট্য

বাল্মীকিপ্রতিভা

রবীন্দ্রনাথ ঠাকুর



সূচিপত্র

• প্রথম দৃশ্য.....	3
• দ্বিতীয় দৃশ্য.....	8
• তৃতীয় দৃশ্য.....	10
• চতুর্থ দৃশ্য.....	13
• পঞ্চম দৃশ্য.....	19

সূচনা

বাল্মীকিপ্রতিভায় একটি নাট্যকথাকে গানের সূত্র দিয়ে গাঁথা হয়েছিল, মায়ার খেলায় গানগুলিকে গাঁথা হয়েছিল নাট্যসূত্রে। একটা সময় এসেছিল যখন আমার গীতিকাব্যিক মনোবৃত্তির ফাঁকের মধ্যে মধ্যে নাট্যের উঁকিঝুঁকি চলছিল। তখন সংসারের দেউড়ি পার হয়ে সবে ভিতর-মহলে পা দিয়েছি; মানুষে মানুষে সম্বন্ধের জাল-বুনোনিটাই তখন বিশেষ করে ঔৎসুক্যের বিষয় হয়ে উঠেছিল। বাল্মীকিপ্রতিভাতে দস্যুর নির্মমতাকে ভেদ করে উচ্ছ্বসিত হল তার অন্তর্গূঢ় করুণা। এইটেই ছিল তার স্বাভাবিক মানবত্ব যেটা ঢাকা পড়েছিল অভ্যাসের কঠোরতায়। একদিন দ্বন্দ্ব ঘটল, ভিতরকার মানুষ হঠাৎ এল বাইরে। প্রকৃতির প্রতিশোধেও এই দ্বন্দ্ব। সন্ন্যাসীর মধ্যে চিরকালের যে মানুষ প্রচ্ছন্ন ছিল তার বাঁধন ছিঁড়ল। কবির মনের মধ্যে বাজছিল মানুষের জয়গান। মায়ার খেলায় গানের ভিতর দিয়ে অল্প যে একটুখানি নাট্য দেখা দিচ্ছে সে হচ্ছে এই যে, প্রমদা আপনার স্বভাবকেই জানতে পারে নি অহংকারে, অবশেষে ভিতর থেকে বাজল বেদনা, ভাঙল মিথ্যে অহংকার, প্রকাশ পেল সত্যকার নারী। মায়াকুমারীদের কাছ থেকে এই ভর্ৎসনা কানে এল:

এরা সুখের লাগি চাহে প্রেম, প্রেম মেলে না—
শুধু সুখ চলে যায়, এমনি মায়ার ছলনা।

প্রথম দৃশ্য

অরণ্য

বনদেবীগণ

সহে না সহে না কাঁদে পরান।
সাধের অরণ্য হল শ্মশান।
দস্যুদলে আসি শান্তি করে নাশ,
ত্রাসে সকল দিশ কম্পমান।
আকুল কানন, কাঁদে সমীরণ,
চকিত মৃগ, পাখি গাহে না গান।
শ্যামল তৃণদল, শোণিতে ভাসিল,
কাতর রোদন-রবে ফাটে পাষণ।
দেবী দুর্গে, চাহো, ত্রাহি এ বনে—
রাখো অধীনী জনে, করো শান্তি দান।

[প্রস্থান

প্রথম দস্যুর প্রবেশ

আঃ বেঁচেছি এখন।
শর্মা ওদিকে আর নন।
গোলেমালে ফাঁকতালে পালিয়েছি কেমন।
লাঠালাঠি কাটাকাটি, ভাবতে লাগে দাঁত-কপাটি,
তাই মানটা রেখে প্রাণটা নিয়ে সটকেছি কেমন।
আসুক তারা অসুক আগে, দুনোদুনি নেব ভাগে—
স্যাস্তামিতে আমার কাছে দেখব কে কেমন।
শুধু মুখের জোরে গলার চোটে লুট-করা ধন নেব লুটে।
শুধু দুলিয়ে ভুঁড়ি বাজিয়ে তুড়ি করব সরগরম।

লুটের দ্রব্য লইয়া দস্যুগণের প্রবেশ

এনেছি মোরা এনেছি মোরা রাশি রাশি লুটের ভার।
করেছি ছারখার—
কত গ্রাম পল্লী লুটে-পুটে করেছি একাকার।

প্রথম দস্যু। আজকে তবে মিলে সবে করব লুটের ভাগ,
এ সব আনতে কত লণ্ডভণ্ড করনু যজ্ঞ-যাগ।
দ্বিতীয় দস্যু। কাজের বেলায় উনি কোথা যে ভাগেন,
ভাগের বেলায় আসেন আগে আরে দাদা!

প্রথম দস্যু। এত বড়ো আস্পর্ধা তোদের, মোরে নিয়ে এ কী হাসি-
তামাশা!

এখনি মুণ্ড করিব খণ্ড, খবরদার রে খবরদার!
দ্বিতীয় দস্যু। হাঃ হাঃ, ভায়া খাপ্লা বড়ো এ কী ব্যাপার!
আজি বুঝিবা বিশ্ব করবে নস্য, এমনি যে আকার।
তৃতীয় দস্যু। এমনি যোদ্ধা উনি, পিঠেতেই দাগ,
তলোয়ারে মরিচা মুখেতেই রাগ।

প্রথম দস্যু। আর যে এ-সব সহে না প্রাণে,
নাহি কি তোদের প্রাণের মায়া?
দারুণ রাগে কাঁপিছে অঙ্গ—
কোথা রে লাঠি কোথা রে ঢাল?

সকলে। হাঃ হাঃ, ভায়া খাপ্লা বড়ো এ কী ব্যাপার!
আজি বুঝিবা বিশ্ব করবে নস্য, এমনি যে আকার।
বাল্মীকির প্রবেশ

সকলে। এক ডোরে বাঁধা আছি মোরা সকলে।
না মানি বারণ, না মানি শাসন, না মানি কাহারে।
কে বা রাজা, কার রাজ্য, মোরা কী জানি—
প্রতি জনেই রাজা মোরা, বনই রাজধানী!
রাজা প্রজা, উঁচু নিচু, কিছু না গনি!

ত্রিভুবন মাঝে আমরা সকলে কাহারে না করি ভয়,
মাথার উপরে রয়েছেন কালী, সমুখে রয়েছে জয়!
বাল্মীকির প্রতি

প্রথম দস্যু। এখন করব কী বন্।

সকলে। এখন করব কী বন্।

প্রথম দস্যু। হো রাজা, হাজির রয়েছে দল।

সকলে। বন্ রাজা, করব কী বন্, এখন করব কী বন্।

প্রথম দস্যু। পেলে মুখেরই কথা আনি যমেরই মাথা।

করে দিই রসাতল!

সকলে। করে দিই রসাতল!

সকলে। হো রাজা, হাজির রয়েছে দল—

বন্ রাজা, করব কী বন্, এখন করব কী বন্।

বাল্মীকি। শোন্ তোরা তবে শোন্।

অমানিশা আজিকে, পূজা দেব কালীকে—

ত্বরা করি যা তবে, সবে মিলি যা তোরা,

বলি নিয়ে আয়

[বাল্মীকির প্রশ্নান

সকলে। ত্রিভুবন মাঝে আমরা সকলে কাহারে না করি ভয়—

মাথার উপরে রয়েছেন কালী, সমুখে রয়েছে জয়!

তবে আয় সবে আয় তবে আয় সবে আয়—

তবে ঢাল্ সুরা, ঢাল্ সুরা, ঢাল্ ঢাল্ ঢাল্!

দয়া মায়া কোন্ ছার, ছারখার হোক!

কে বা কাঁদে কার তরে, হাঃ হাঃ হাঃ!

তবে আন্ তলোয়ার, আন্ আন্ তলোয়ার,

তবে আন্ বরশা, আন্ আন্ দেখি ঢাল!

প্রথম দস্যু। আগে পেটে কিছু ঢাল, পরে পিঠে নিবি ঢাল।

হাঃ হাঃ, হাঃ হাঃ হাঃ হাঃ!

হাঃ হাঃ হাঃ হাঃ, হাঃ হাঃ!

উঠিয়া

সকলে। কালী কালী কালী বলো রে আজ

বলো হো, হো হো, বলো হো, বলো হো!

নামের জোরে সাধিব কাজ,

বলো হো, হো, বলো হো, বলো হো!

ওই ঘোর মত্ত করে নৃত্য রঙ্গ মাঝারে,

ওই লক্ষ লক্ষ যক্ষ রক্ষ ঘেরি শ্যামারে,

ওই লটু-পটু-কেশ অটু অটু হাসে রে—

হহা হহহা হহহা!

আরে বল্ রে শ্যামা মায়ের জয়, জয় জয়!

জয় জয়, জয় জয়, জয় জয়, জয় জয়,

আরে বল্ রে শ্যামা মায়ের জয়, জয় জয়!

আরে বল্ রে শ্যামা মায়ের জয়!

[গমনোদ্যম

একটি বালিকার প্রবেশ

বালিকা। ওই মেঘ করে বুঝি গগনে!

আঁধার ছাইল, রজনী আইলু

ঘরে ফিরে যাব কেমনে!

চরণ অবশ হয়, শ্রান্ত ক্লান্ত কায়

সারা দিবস বন ভ্রমণে।

ঘরে ফিরে যব কেমনে!

এ কী এ ঘোর বন! – এনু কোথায়!
পথ যে জানি না, মোরে দেখায়ে দে-না!
কী করি এ আঁধার রাতে!
কী হবে মোর হয়!

ঘন ঘোর মেঘ ছেয়েছে গগনে,
চকিত চপলা চমকে সঘনে,
একেলা বালিকা তরাসে কাঁপে কায়!
বালিকার প্রতি

প্রথম দস্যু। পথ ভুলেছিস সত্যি বটে? সিধে রাস্তা দেখতে চাস?
এমন জায়গায় পাঠিয়ে দেব, সুখে থাকবি বারো মাস।
সকলে। হাঃ হাঃ হাঃ, হাঃ হাঃ হাঃ!
প্রথমের প্রতি

দ্বিতীয় দস্যু। কেমন হে ভাই! কেমন সে ঠাঁই?
প্রথম দস্যু। মন্দ নহে বড়ো,
এক দিন না এক দিন সবাই সেথায় হব জড়ো।
সকলে। হাঃ হাঃ হাঃ, হাঃ হাঃ হাঃ!

তৃতীয় দস্যু। আয় সাথে আয়, রাস্তা তোরে দেখিয়ে দিই গে তবে—
আর তা হলে রাস্তা ভুলে ঘুরতে নাহি হবে।
সকলে। হাঃ হাঃ হাঃ, হাঃ হাঃ হাঃ!
বনদেবীগণের প্রবেশ

মরি ও কাহার বাছা, ওকে কোথায় নিয়ে যায়।
আহা ওই করুণ চোখে ও কাহার পানে চায়!
বাঁধা কঠিন পাশে, অঙ্গ কাঁপে ত্রাসে,
আঁখি জলে ভাসে, এ কী দশা হয়!
এ বনে কে আছে, যাব কার কাছে, কে ওরে বাঁচায়।

দ্বিতীয় দৃশ্য

অরণ্যে কালী-প্রতিমা

বাল্মীকি স্তবে আসীন

বাল্মীকি। রাঙা-পদ-পদ্যুগে প্রণমি গো ভবদারা!

আজি এ ঘোর নিশীথে পূজিব তোমারে তারা!

সুরনর খরখর— ব্রহ্মাণ্ড বিপ্লব করো,

রণরঙ্গে মাতো মা গো, ঘোর উন্মাদিনী পারা।

ঝলসিয়ে দিশি দিশি, ঘুরাও তড়িৎ অসি,

ছুটাও শোণিতস্রোত, ভাসাও বিপুল ধরা।

উরো কালী কপালিনী, মহাকালসীমন্তিনী,

লহো জবাপুষ্পাঞ্জলি মহাদেবী পরাৎপরা!

বালিকাকে লইয়া দস্যুগণের প্রবেশ

দস্যুগণ। দেখো, হো ঠাকুর, বলি এনেছি মোরা।

বড়ো সরেস, পেয়েছি বলি সরেস—

এমন সরেস মছলি, রাজা, জালে না পড়ে ধরা

দেরি কেন ঠাকুর, সেরে ফেলো তুরা।

বাল্মীকি। নিয়ে আয় কৃপাণ, রয়েছে তৃষিতা শ্যামা মা,

শোণিত পিয়াও— যা তুরায়।

লোল জিহ্বা লকলকে, তড়িৎ খেলে চোখে,

করিয়ে খণ্ড দিগ্দিগন্ত ঘোর দন্ত ভায়।

বালিকা। কী দোষে বাঁধিলে আমায়, আনিলে কোথায়।

পথহারা একাকিনী বনে অসহায়—

রাখো রাখো রাখো, বাঁচাও আমায়!

দয়া করো অনাথারে, কে আমার আছে,

বন্ধনে কাতর তনু মরি যে ব্যথায়।

নেপথ্যে

বনদেবী। দয়া করো অনাথারে, দয়া করো গো,
বন্ধনে কাতর তনু জর্জর ব্যথায়।
বাল্মীকি। এ কেমন হল মন আমার।
কী ভাব এ যে কিছুই বুঝিতে যে পারি নে—
পাষণ হৃদয়ও গলিল কেন রে,
কেন আজি আঁখিজল দেখা দিল নয়নে!
কী মায়া এ জানে গো,
পাষণের বাঁধ এ যে টুটিল,
সব ভেসে গেল গো, সব ভেসে গেল গো—
মরুভূমি ডুবে গেল করুণার প্লাবনে!
প্রথম দস্যু। আরে, কী এত ভাবনা কিছু তো বুঝি না।
দ্বিতীয় দস্যু। সময় বহে যায় যে।
তৃতীয় দস্যু। কখন এনেছি মোরা, এখনো তো হল না!
চতুর্থ দস্যু। এ কেমন রীতি তব, বাহু রে।
বাল্মীকি। না না হবে না, এ বলি হবে না,
অন্য বলির তরে, যা রে যা।
প্রথম দস্যু। অন্য বলি এ রাতে কোথা মোরা পাব?
দ্বিতীয় দস্যু। এ কেমন কথা কও, বাহু রে!
বাল্মীকি। শোন্, তোরা শোন্ এ আদেশ!
কৃপাণ খর্পর ফেলে দে দে!
বাঁধন কর্ ছিন্ন, মুক্ত কর্ এখনি রে।

যথাদিষ্ট কৃত

তৃতীয় দৃশ্য

অরণ্য

বাল্মীকি

বাল্মীকি। ব্যাকুল হয়ে বনে বনে
ভ্রমি একেলা শূন্যমনে।
কে পুরাবে মোর কাতর প্রাণ,
জুড়াবে হিয়া সুধাবরিষণে!

[প্রস্থান

দস্যুগণ বালিকাকে পূর্নবার ধরিয়া আনিয়া

ছাড়ব না ভাই, ছাড়ব না ভাই,
এমন শিকার ছাড়ব না।
হাতের কাছে অম্নি এল, অম্নি যাবে!
অম্নি যেতে দেবে কে রে!
রাজাটা খেপেছে রে, তার কথা আর মানব না।
আজ রাতে ধুম হবে ভারি,
নিয়ে আয় কারণ বারি,
জ্বলে দে মশালগুলো, মনের মতন পুজো দেব—
নেচে নেচে ঘুরে ঘুরে— রাজাটা খেপেছে রে,
তার কথা আর মানব না।

প্রথম দস্যু। রাজা মহারাজা কে জানে, আমিই রাজাধিরাজ।

তুমি উজির, কোতোয়াল তুমি,
ওই ছোঁড়াগুলো বরকন্দাজ।
যত-সব কুঁড়ে আছে ঠাঁই জুড়ে,
কাজের বেলায় বুদ্ধি যায় উড়ে।
পা ধোবার জল নিয়ে আয় ঝাট্,

কর তোরা সব যে যার কাজ।
দ্বিতীয় দস্যু। আছে তোমার বিদ্যে-সাধি জানা।
রাজত্ব করা এ কি তামাশা পেয়েছ!
প্রথম দস্যু। জানিস না কেটা আমি!
দ্বিতীয় দস্যু। ঢের ঢের জানি- ঢের ঢের জানি।
প্রথম দস্যু। হাসিস নে হাসিস নে মিছে, যা যা-
সব আপন কাজে যা যা, যা আপন কাজে।
দ্বিতীয় দস্যু। খুব তোমার লম্বাচওড়া কথা!
নিতান্ত দেখি তোমায় কৃতান্ত ডেকেছে।
তৃতীয় দস্যু। আঃ কাজ কী গোলমালে, না হয় রাজাই সাজালে।
মরবার বেলায় মরবে ওটাই, থাকব ফাঁকতালে।
প্রথম দস্যু। রাম রাম, হরি হরি, ওরা থাকতে আমি মরি!
তেমন তেমন দেখলে, বাবা ঢুকব আড়ালে।
সকলে। ওরে চল্ তবে শিগ্গিরি,
আনি পূজোর সামিগ্গিরি।
কথায় কথায় রাত পোহাল, এমনি কাজের ছিри।

[প্রস্থান

হা কী দশা হল আমার!
কোথা গো মা করুণাময়ী, অরণ্যে প্রাণ যায় গো!
মুহূর্তের তরে মা গো, দেখা দাও আমারে-
জনমের মত বিদায়!

পূজার উপকরণ লইয়া দস্যুগণের প্রবেশ
ও কালী-প্রতিমা ঘিরিয়া নৃত্য
এত রঙ্গ শিখেছ কোথা মুণ্ডমালিনী!
তোমার নৃত্য দেখে চিত্ত কাঁপে, চমকে ধরণী।

ক্ষান্ত দে মা, শান্ত হ মা, সন্তানের মিনতি।
রাগা নয়ন দেখে নয়ন মুদি, ও মা ত্রিনয়নী।
বাল্মীকির প্রবেশ

বাল্মীকি। অহো আস্পর্ধা এ কী তোদের নরাধম!
তোদের কারেও চাহি নে আর, আর, আর না রে—
দূর দূর দূর, আমারে আর ছুঁস নে।
এ-সব কাজ আর না, এ পাপ আর না,
আর না আর না— ত্রাহি, সব ছাড়িনু!

প্রথম দস্যু। দীন হীন এ অধম আমি কিছুই জানি নে রাজা!
এরাই তো যত বাধালে জঞ্জাল,
এত করে বোঝাই বোঝে না—
কী করি, দেখো বিচারি।

দ্বিতীয় দস্যু। বাঃ— এও তো বড়ো মজা, বাহবা!
যত কুয়ের গোড়া ওই তো, আরে বল্-না রে!

প্রথম দস্যু। দূর দূর দূর, নির্লজ্জ আর বকিস নে।
বাল্মীকি। তফাতে সব সরে যা। এ পাপ আর না,
আর না, আর না—ত্রাহি, সব ছাড়িনু।

[দস্যুগণের প্রশ্নান

বাল্মীকি। আয় মা, আমার সাথে, কোনো ভয় নাহি আর।
কত দুঃখ পেলি বনে আহা মা আমার!
নয়নে ঝরিছে বারি, এ কি মা সহিতে পারি!
কোমল কাতর তনু কাঁপিতেছে বার বার।

[প্রশ্নান

চতুর্থ দৃশ্য

বনদেবীগণের প্রবেশ

রিম্‌ রিম্‌ ঘন ঘন রে বরষে।
গগনে ঘনঘটা, শিহরে তরলতা,
ময়ূর ময়ূরী নাচিছে হরষে।
দিশি দিশি সচকিত দামিনী চমকিত,
চমকি উঠিছে হরিণী তরাসে!

[প্রস্থান

বাঙ্গালীকির প্রবেশ

কোথায় জুড়াতে আছে ঠাই—
কেন প্রাণ কেন কাঁদে রে!
যাই দেখি শিকারেতে,
রহিব আমোদে মেতে,
ভুলি সব জ্বালা, বনে বনে ছুটিয়ে—
কেন প্রাণ কেন কাঁদে রে!
আপনা ভুলিতে চাই, ভুলিব কেমনে—
কেমনে যাবে বেদনা!
ধরি ধনু আনি বাণ, গাহিব ব্যাধের গান,
দলবল লয়ে মাতিব।
কেন প্রাণ কেন কাঁদে রে!

শৃঙ্গধ্বনিপূর্বক দস্যুগণকে আহ্বান

দস্যুগণের প্রবেশ

দস্যু। কেন রাজা? ডাকিস কেন, এসেছি সবে।
বুঝি আবার শ্যামা মায়ের পূজো হবে।

বাল্মীকি। শিকারে হবে যেতে, আয় রে সাথে।
প্রথম দস্যু। ওরে, রাজা কী বলছে শোন্।
সকলে। শিকারে চল তবে।

সবারে আন্ ডেকে যত দলবল সবে।

[বাল্মীকির প্রশ্নান

এই বেলা সবে মিলে চলো হো, চলো হো
ছুটে আয় শিকারে কে রে যাবি আয়

এমন রজনী বহে যায় যে!

ধনুর্বাণ লয়ে হাতে, আয় আয় আয় আয়।

বাজা শিঙ্গা ঘন ঘন-শব্দে কাঁপবে বন-

আকাশ ফেটে যাবে, চমকিবে পশু পাখি সবে,

ছুটে যাবে কাননে কাননে! চারি দিকে ঘিরে

যাব পিছে পিছে, হো হো হো হো!

বাল্মীকির প্রবেশ

বাল্মীকি। গহনে গহনে যা রে তোরা, নিশি বহে যায় যে।

তন্ন তন্ন করি অরণ্য, করী বরাহ খোঁজ গে,

এই বেলা যা রে।

নিশাচর পশু সবে, এখনি বাহির হবে-

ধনুর্বাণ নে রে হাতে, চল্ তুরা চল্।

জ্বালায়ে মশাল-আলো, এই বেলা আয় রে।

[প্রশ্নান

প্রথম দস্যু। চল্ চল্ ভাই, তুরা করে মোরা আগে যাই।

দ্বিতীয় দস্যু। প্রাণপণ খোঁজ্ এ বন সে বন,

চল্ মোরা ক' জন ও দিকে যাই।

প্রথম দস্যু। না না ভাই, কাজ নাই

হোথা কিছু নাই, কিছু নাই—

ওই ঝোপে যদি কিছু পাই।

দ্বিতীয় দস্যু। বরা বরা—

প্রথম দস্যু। আরে দাঁড়া দাঁড়া, অত ব্যস্ত হলে ফসকাবে শিকার,

চুপি চুপি আয় চুপি চুপি আয় অশখতলায়—

এবার ঠিকঠাক হয়ে সব থাক্।

সাবধান ধরো বাণ, সাবধান ছাড়ো বাণ।

গেল গেল, ঐ ঐ, পালায় পালায়, চল্ চল্।

ছোট্ রে পিছে, আয় রে তুরা যাই।

বনদেবীগণের প্রবেশ

কে এল আজি এ ঘোর নিশীথে,

সাধের কাননে শান্তি নাশিতে!

মত্ত করী যত পদুবন দলে

বিমল সরোবর মন্ডিয়া,

ঘুমন্ত বিহগে কেন বধে রে

সঘনে খর শর সন্ধিয়া!

তরাসে চমকিয়ে হরিণ-হরিণী

স্বলিত চরণে ছুটিছে।

স্বলিত চরণে ছুটিছে কাননে,

করণ নয়নে চাহিছে—

আকুল সরসী, সারস-সারসী

শর-বনে পশি কাঁদিছে।

তিমির দিগ্ ভরি ঘোর যামিনী

বিপদঘনছায়া ছাইয়া—

কী জানি কী হবে আজি এ নিশীথে,

তরাসে প্রাণ ওঠে কাঁপিয়া।

প্রথম দস্যুর প্রবেশ

প্রথম দস্যু। প্রাণ নিয়ে তো সটকেছি রে, করবি এখন কী!
ওরে বরা, করবি এখন কী!

বাবা রে, আমি চুপ করে এই কচুবনে লুকিয়ে থাকি।
এই মরদের মুরদখানা, দেখেও কি রে ভড়কালি না!
বাহবা, শাবাশ তোরে, শাবাশ রে তোর ভরসা দেখি।
খোঁড়াইতে খোঁড়াইতে
আর একজন দস্যুর প্রবেশ

অন্য দস্যু। বলব কী আর বলব খুড়ো- উঁ উঁ।
আমার যা হয়েছে বলি কার কাছে-
একটা বুড়ো ছাগল তেড়ে এসে মেরেছে টুঁ।
প্রথম দস্যু। তখন যে ভারি ছিল জারিজুরি,
এখন কেন করছ বাপু উঁ উঁ উঁ-
কোনখানে লেগেছে বাবা, দিই একটু ফুঁ।

দস্যুগণের প্রবেশ

দস্যুগণ। সর্দার মহাশয় দেরি না সয়-
তোমার আশায় সবাই বসে।
শিকারেতে হবে যেতে,
মিহি কোমর বাঁধো কষে।
বনবাদাড় সব ঘেঁটে ঘুঁটে,
আমরা মরব খেটে খুটে,
তুমি কেবল লুটে পুটে
পেট পোরাবে ঠেসে ঠুসে।
প্রথম দস্যু। কাজ কী খেয়ে, তোফা আছি-
আমায় কেউ না খেলেই বাঁচি-
শিকার করতে যায় কে মরতে,

টুঁসিয়ে দেবে বরা মোষে।
টুঁ খেয়ে তো পেট ভরে না—
সাধের পেটটি যাবে ফেঁসে।

হাসিতে হাসিতে প্রস্থান ও শিকারের
পশ্চাৎ পশ্চাৎ পুনঃপ্রবেশ

বাল্মীকির দ্রুতপ্রবেশ

বাল্মীকি। রাখ্ রাখ্ ফেল্ ধনু, ছাড়িস নে বাণ।
হরিণ-শাবক দুটি প্রাণভয়ে ধায় ছুটি,
চাহিতেছে ফিরে ফিরে করুণ নয়ান।
কোনো দোষ করে নি তো সুকুমার কলেবর—
কেমনে কোমল দেহে বিঁধিবি কঠিন শর!
থাক্ থাক্ ওরে থাক্, এ দারুণ খেলা রাখ্,
আজ হতে বিসর্জিনু এ ছার ধনুক বাণ।

[প্রস্থান

দস্যুগণের প্রবেশ

দস্যুগণ। আর না আর না, এখানে আর না—
আয় রে সকলে চলিয়া যাই।
ধনুক বাণ ফেলেছে রাজা,
এখানে কেমনে থাকব ভাই!
চল্ চল্ চল্ এখনি যাই।
বাল্মীকির প্রবেশ

দস্যুগণ। তোর দশা, রাজা, ভালো তো নয়!
রক্তপাতে পাস রে ভয়!
লাজে মোরা মরে যাই।
পাখিটি মারিলে কাঁদিয়া খুন,

না জানি কে তোরে করিল গুণ-
হেন কভু দেখি নাই।

[দস্যুগণের প্রশ্নান

পঞ্চম দৃশ্য

বাল্মীকি। জীবনের কিছু হল না হয়—
হল না গো হল না হয় হয়!
গহনে গহনে কত আর ভ্রমিব, নিরাশার এ আঁধারে?
শূন্য হৃদয় আর বহিতে যে পারি না,
পারি না গো পারি না আর।
কী লয়ে এখন ধরিব জীবন, দিবসরজনী চলিয়া যায়—
দিবসরজনী চলিয়া যায়—
কত কী করিব বলি কত উঠে বাসনা,
কী করিব জানি না গো!
সহচর ছিল যারা, ত্যেজিয়া গেল তারা। ধনুর্বাণ ত্যেজেছি,
কোনো আর নাহি কাজ—
কী করি কী করি বলি হাহা করি ভ্রমি গো—
কী করিব জানি না যে!

ব্যাধগণের প্রবেশ

প্রথম ব্যাধ। দেখ্ দেখ্, দুটো পাখি বসেছে গাছে।
দ্বিতীয় ব্যাধ। আয় দেখি চুপি চুপি আয় রে কাছে।
প্রথম ব্যাধ। আরে ঝট্ করে এই বারে ছেড়ে দে রে বাণ।
দ্বিতীয় ব্যাধ। রোস্ রোস্ আগে আমি করি রে সন্ধান।
বাল্মীকি। থাম্ থাম্, কী করিবি বধি পাখিটির প্রাণ!
দুটিতে রয়েছে সুখে, মনের উল্লাসে গাহিতেছে গান।
প্রথম ব্যাধ। রাখো মিছে ও-সব কথা,
কাছে মোদের এসো নাকো হেথা।
চাই নে ও-সব শাস্ত্র কথা, সময় বহে যায় যে।

বাল্মীকি। শোনো শোনো মিছে রোষ করো না।
ব্যাধ। থামো থামো ঠাকুর, এই ছাড়ি বাণ।
একটি ত্রৌণ্ডকে বধ

বাল্মীকি। মা নিষাদ প্রতিষ্ঠাং তুমগমঃ শাস্বতীঃ সমাঃ,
যৎ ত্রৌণ্ডমিথুনাদেকমবধীঃ কামমোহিতম্।
কী বলিনু আমি! এ কী সুললিত বাণী রে!
কিছু না জানি কেমনে যে আমি প্রকাশিনু দেবভাষা,
এমন কথা কেমনে শিখিনু রে!
পুলকে পুরিল মনপ্রাণ, মধু বরষিল শ্রবণে,
এ কী! হৃদয়ে এ কী এ দেখি! –
ঘোর অন্ধকার-মাঝে, এ কী জ্যোতি ভায়!
অবাক! – করুণা এ কার!
সরস্বতীর আবির্ভাব

বাল্মীকি। এ কী এ, এ কী এ, স্থিরচপলা!
কিরণে কিরণে হল সব দিক উজলা!
কী প্রতিমা দেখি এ, জোছনা মাখিয়ে
কে রেখেছে আঁকিয়ে
আ মরি কমলপুতলা!

[ব্যাধগণের প্রস্থান

বনদেবীগণের প্রবেশ

বনদেবী। নমি নমি ভারতী, তব কমলচরণে
পুণ্য হল বনভূমি, ধন্য হল প্রাণ।
বাল্মীকি। পূর্ণ হল বাসনা, দেবী কমলাসনা!
ধন্য হল দস্যুপতি, গলিল পাষণ।
বনদেবী। কঠিন ধরাভূমি এ, কমলালয়া তুমি যে–
হৃদয়কমলে চরণকমল করো দান।

বাল্মীকি। তব কমলপরিমলে রাখো হৃদি ভরিয়ে,
চিরদিবস করিব তব চরণসুধা পান।

[দেবীগণের অন্তর্ধান

কালী-প্রতিমার প্রতি বাল্মীকি

শ্যামা, এবার ছেড়ে চলেছি মা।

পাষণের মেয়ে পাষণী, না বুঝে মা বলেছি মা!

এত দিন কী ছল করে তুই, পাষণ করে রেখেছিল!

আজ আপন মায়ের দেখা পেয়ে, নয়ন-জলে গলেছি মা!

কালো দেখে ভুলি নে আর, আলো দেখে ভুলেছে মন—

আমায় তুমি ছলেছিলে, এবার আমি তোমায় ছলেছি মা!

মায়ার মায়া কাটিয়ে এবার মায়ের কোলে চলেছি মা!

ষষ্ঠ দৃশ্য

বাল্মীকি। কোথা লুকাইলে!

সব আশা নিবিল, দশ দিশি অন্ধকার,

সবে গেছে চলে ত্যেজিয়ে আমারে—

তুমিও কি তেয়াগিলে!

লক্ষ্মীর আবির্ভাব

লক্ষ্মী। কেন গো আপন মনে ভ্রমিছ বনে বনে,

সলিল দু' নয়নে কিসের দুখে?

কমলা দিতেছি আসি, রতন রাশি রাশি,

ফুটুক তবে হাসি মলিন মুখে।

কমলা যারে চায়, বলো সে কী না পায়,

দুখের এ ধরায় থাকে সে সুখে।

ত্যেজিয়া কমলাসনে, এসেছি ঘোর বনে,

আমারে শুভক্ষণে হেরো গো চোখে।

বাল্মীকি। কোথায় সে উষাময়ী প্রতিমা!

তুমি তো নহ সে দেবী কমলাসনা,

কোরো না আমারে ছলনা।

কী এনেছ ধন মান, তাহা যে চাহে না প্রাণ।

দেবী গো, চাহি না, চাহি না, মণিময় ধূলিরাশি চাহি না,

তাহা লয়ে সুখী যারা হয় হোক, হয় হোক—

আমি, দেবী, সে সুখ চাহি না।

যাও লক্ষ্মী অলকায়, যাও লক্ষ্মী অমরায়,

এ বনে এসো না এসো না,

এসো না এ দীনজনকুটিরে।

যে বীণা শুনেছি কানে মন প্রাণ আছে ভোর,

আর কিছু চাহি না, চাহি না।

[লক্ষ্মীর অন্তর্ধান

বাল্মীকির প্রস্থান

বনদেবীগণের প্রবেশ

বাণী বীণাপাণি, করুণাময়ী!
অন্ধজনে নয়ন দিয়ে অন্ধকারে ফেলিলে,
দরশ দিয়ে লুকালে কোথা দেবী অয়ি!
স্বপন সম মিলাবে যদি কেন গো দিলে চেতনা,
চকিতে শুধু দেখা দিয়ে চির মরমবেদনা,
তোমারে চাহি ফিরিছে, হেরো কাননে কাননে ওই।

[বনদেবীগণের প্রস্থান

বাল্মীকির প্রবেশ

সরস্বতীর আবির্ভাব

বাল্মীকি। এই-যে হেরি গো দেবী আমারই!
সব কবিতাময় জগত-চরাচর,
সব শোভাময় নেহারি।
হুন্দে উঠিছে চন্দ্রমা, হুন্দে কনক-রবি উদিছে,
হুন্দে জগমগুল চলিছে,
জ্বলন্ত কবিতা তারকা সবে—
এ কবিতার মাঝারে তুমি কে গো দেবী,
আলোকে আলো আঁধারি!
আজি মলয় আকুল, বনে বনে এ কী এ গীত গাহিছে,
ফুল কহিছে প্রাণের কাহিনী,
নব রাগ-রাগিনী উছাসিছে।
এ আনন্দে আজ গীত গাহে মোর হৃদয় সব অবারি।
তুমিই কি দেবী ভারতী, কৃপাগুণে অন্ধ আঁখি ফুটালে,

উষা আনিলে প্রাণের আঁধারে,
প্রকৃতির রাগিণী শিখাইলে!
তুমি ধন্য গো,
রব চিরকাল চরণ ধরি তোমারি।
সরস্বতী। দীনহীন বালিকার সাজে
এসেছিনু ঘোর বনমাঝে
গলাতে পাষণ তোর মন—
কেন বৎস, শোন, তাহা শোন।
আমি বীণাপাণি, তোরে এসেছি শিখাতে গান,
তোর গানে গলে যাবে সহস্র পাষণ-প্রাণ।
যে রাগিণী শুনে তোর গলেছে কঠোর মন
সে রাগিণী তোর কণ্ঠে বাজিবে রে অনুক্ষণ।
অধীর হইয়া সিন্ধু কাঁদিবে চরণতলে,
চারি দিকে দিক্-বধু আকুল নয়নজলে।
মাথার উপরে তোর কাঁদিবে সহস্র তারা,
অশনি গলিয়া গিয়া হইবে অশ্রু ধারা।
যে করুণ রসে আজি ডুবিল রে ও হৃদয়
শতস্রোতে তুই তাহা ঢালিবি জগৎময়।
যেথায় হিমাদ্রি আছে সেথা তোর নাম রবে,
যেথায় জাহ্নবী বহে তোর কাব্যস্রোত ব'বে।
সে জাহ্নবী বহিবেক অযুত হৃদয় দিয়া
শ্মশান পবিত্র করি, মরুভূমি উর্বরিয়া।
মোর পদাসনতলে রহিবে আসন তোর
নিত্য নব নব গীতে সতত রহিবি ভোর!
বসি তোর পদতলে কবি-বালকেরা যত
শুনি তোর কণ্ঠস্বর শিখিবে সংগীত কত।
এই নে আমার বীণা, দিনু তোরে উপহার,
যে গান গাহিতে সাধ, ধ্বনিবে ইহার তার।

বান্ধীকিপ্রতিভা